

'Demokrat palsu' nak benderang berita palsu, sindir Hanipa
Malaysia Kini.com
7 Februari 2018

Anggota parlimen Sepang Hanipa Maidin hari ini menyindir usaha kerajaan untuk menggubal undang-undang baru bagi membendung berita palsu.

"Difahamkan BN nak gubal undang-undang dalam sidang parlimen bulan depan ini bagi mengekang berita palsu.

"Hairanlah demokrat palsu nak benderang berita palsu!" kata pemimpin Parti Amanah Negara (AMANAH) itu.

Menteri di Jabatan Perdana Menteri Datuk Seri Azalina Othman Said hari ini berkata langkah itu berkait rapat dengan keselamatan negara dan tidak hanya berpaksikan politik semata-mata.

Beliau justeru meminta pembangkang bekerjasama dan tidak membuat tuduhan melulu atas pelaksanaan akta tersebut.

Dalam kenyataan hari ini, Hanipa berkata realitinya dalam negara ini rakyat menjadi mangsa kerana "berita benar dan tepat".

"Contoh yang klasik kes rakan baik saya, YB Pandan. Dihukum penjara 30 bulan sebab dedah berita benar dan tepat.

"Yang terpalit dengan berita benar itu bebas di luar dan khabarnya sibuk nak jadi calon PRU," katanya merujuk kepada kes Naib Presiden PKR Rafizi Ramli.

Hanipa yang juga seorang peguam berkata sudah banyak undang-undang yang "masih hukum rakyat sebab bercakap dan sebar berita benar".

"Contohnya Akta Hasutan dan Akta Rahsia Rasmi (OSA) diguna (baca salah guna) sebab rakyat cakap benda benar.

"Benar bukan satu pembelaan dalam akta-akta itu," katanya.

Hanipa juga memberi bayangan kerajaan tidak akan mendapat laluan mudah ketika membentangkan cadangan akta baru itu di parlimen nanti.

"Insya-Allah dengan mandat rakyat yang hantar kami ke Dewan Rakyat, kami akan bersuara lantang melawan budaya buli BN di sana.

"Kami tak akan rela orang kata jadi MP pasu bunga saja di sana," katanya.

Copyright © 1999-2018 Mkini Dotcom Sdn. Bhd
Source: <https://www.malaysiakini.com/news/411499>